

Headlines

- 1 प्रधानमंत्री नरेंद्र मोदी होरें अज्ज 6में बिमस्टेक शिखर सम्मेलन च हिस्सा लैता ते इसी दुनिया दी बेहतरी लेई इक महत्वपूर्ण मंच दस्सेआ।
- 2 संसद दे दौनें सदनं गी अज्ज अनमित्थे समें लेई स्थगित करी दित्ता गेआ, एहदे कन्नै गै संसद दा बजट सत्र अज्ज सम्पन्न होई गेआ।
- 3 भारत सरकार नै आखेआ ऐ जे जम्मू-कश्मीर च 393 गाएं गी जनजातीय विकास पहलकदमी राहें लाहू हासल होग।
- 4 जम्मू-कश्मीर च 31 मार्च 2025 तगर 1 लक्ख 88 ज्हार शा बद्द एल.ई.डी स्ट्रीटलाइटों लाइयां गेइयां।
- 5 मौसम विभाग नै अगले हफ्ते जम्मू-कश्मीर च बरखा बरने दी पेशगोई कीती ऐ।

<><><><><><>

PM-Bimstec

प्रधानमंत्री नरेंद्र मोदी होरें अज्ज आखेआ ऐ जे बिमस्टेक दुनिया दी बेहतरी लेई महत्वपूर्ण मंच ऐ ते इसी होर मजबूत कीते जाने दी लोड़ ऐ। थाइलैंड दे बैंकाक च 6में बिमस्टेक शिखर सम्मेलन च प्रधानमंत्री होरें सहयोग कन्नै जुड़ी दी 21 सूत्री कार्य योजना दा प्रस्ताव रक्खेआ। उनें आखेआ जे हून समें आई गेदा ऐ जे बिमस्टेक मुख्य मझाटै बपार बदना चाहिदा। मोदी होरें बिमस्टेक बंज बपार संघ दी स्थापना ते हर बरे बिमस्टेक बपार शिखर सम्मेलन दे आयोजन दी बी घोषणा कीती। प्रधानमंत्री मोदी होरें शिखर सम्मेलन दे बक्ख बाहरें बंगलादेश दे मुख सलाहकार मोहम्मद युनुस हुंदे कन्नै बी मलाटी कीती। प्रधानमंत्री मोदी होरें भूटान ते प्रधानमंत्री शेरींग तोबगे हुंदे कन्नै बी शिखर सम्मेलन दे बक्ख बाहरें मलाटी कीती। इक सोशल मीडिया पोस्ट च उनें आखेआ जे भारत कन्नै भूटान दी मित्रता बड़ी जीवंत ऐ ते दौनें मुख्य बक्ख-बक्ख खेत्तरे च सहयोग करा'रदे ना।

<><><><><><>

Parl. Adjourned

संसद दे दौनें सदनें गी अज्ज अनमित्थे समें लेई स्थगित करी दित्ता गेआ। एह्दे कन्नै गै संसद दा बजट सत्र अज्ज सम्पन्न होई गेआ। एह् सत्र 31 जनवरी गी शुरू होआ हा। अपने समापनी भाषणै च लोकसभा अध्यक्ष ओम बिरला होरें दस्सेआ जे बजट सत्र दौरान सदन च 118 फीसद उत्पादकता दर्ज कीती गेई। उनें आखेआ जे राज्यसभा च 16 विधेयक पारित कीते गो। एह्दे थवां पैहले संसदीय मामलें दे मंत्री किरें रिजिजू होरें आखेआ जे वक्फ संशोधन विधेयक 2025 पर 17 घंटें थमां मती चर्चा राज्यसभा च होई। उनें आखेआ जे कुसै बी विधेयक पर चर्चा दी सदन दी एह् सभ्भनें थवां बह् अवधि ऐ। उनें आखेआ जे लोकसभा च बी इस विधेयक पर लगभग 14 घंटें तगर चर्चा होई।

<><><><><><>

Tribal-Affairs Minister

जनजातीय मामलें सरबन्धी मंत्रालय नै विस्तार कीते गेदे धरती आभा मिशन दी जम्मू-कश्मीर च अमल-आवरी लेई प्रदेश दे प्रशासन ते होरनें सरबन्धत धड़ें कन्नै अपने सैह्योग दी रूपरेखा तैयार कीती ऐ। इस कार्यक्रम दा मकसद जम्मू-कश्मीर दे 112एं ब्लॉकें दे 393 ग्राएं सने 63 ज्हार 843 ग्राएं च बुनियादी ढांचे दी कमी गी दूर करना ऐ। एह्दा मुख् मकसद सेहत, शिक्षा, आंगनवाड़ी सुविधाएं ते रोजी-रूट्टी कमाने दे मौकें गी बेहतर बनाना ऐ। मंत्रालय नै जम्मू-कश्मीर च मिशन दे तैह् 8 करोड़ 77 लख रपे मंजूर कीते न ते मुकामी प्रशासनें गी लाभार्थिं दे मदाद लेई जागरूकता शिविर आयोजित करने लेई प्रोत्साहित बी कीता ऐ।

<><><><><><>

CS-Highway review

मुख् सचिव अटल डुल्लू होरें उच्च सतह दी बैठक दौरान केंद्र शासित प्रदेश च चला'रदे राष्ट्रीय जरनैली शिड़कें सरबन्धी प्रोजेक्टें दी प्रगति दा जायजा लैता। इनें परियोजनाएं दी महत्ता पर जोर पांदे होई उनें इनें परियोजनाएं गी समेंसिर मुकम्मल करने पर जोर पाया तां जे इन्दे सबूरे होने कन्नै लोकें गी लाहू हासिल होई सकै। उनें दिल्ली अमृतसर-कटड़ा एक्सप्रेस बनिहाल बाइपास गी 4 गड्डिं दे इक्कै बेल्ले लंग्घने जोग बनाने, श्रीनगर रिंग रोड, जम्मू-अखनूर राष्ट्रीय जरनैली शिड़क, चनैनी सुद्धमहादेव शिड़क, खलैनी बाइपास सुरंग ते संपर्क तैह् तोड़ चाढे जा'रदे होर दुए प्रोजेक्टें दा जायजा लैता।

JPDCL

केंद्री बिजली मंत्रालय दे जाइंट सैक्रेटरी शशांक मिसरा होरें बिजली दी बंड सरबंधी Jammu Power Distribution Corporation Limited (JPDCL) दे कम्मकाज दी समीक्षा करने लेई ते नमें सिरेआ तैयार कीती गेदी बंड सरबंधी क्षेत्र योजना (RDSS) तैहत कम्में दी प्रगति दा आंकलन करने लेई जम्मू दा दौरा लाया। बैठक दौरान JPDCL दे मैनेजिंग डायरेक्टर यासिन एम. चौधरी होरें RDSS तैहत हासिल उपलब्धियें, चुनौतियें ते स्कीम गी लागू करने दी स्थिति बारै तफसीली जानकारी दिती। बैठक च NTPC, PESL, RECPDCL ते होरनें मुतलका धड़ें बी हिस्सा लैता ते कम्में दी प्राथमिकता दे कन्नोकन्नी जमीनी सतह पर हालातें दा परतियै मूल्यांकन करने दी लोड़ बारै जानकारी सांझा कीती। जायंट सेक्रेटरी होरें परियोजना दी चुनौतियें कन्नै निब्बड़ने च JPDCL दी प्रतिबद्धता ते सक्रिय रौहू दी सराहना करदे होई कम्में दी प्रगति यकीनी बनाने लेई आखेआ।

<><><><><><>

Manoj Kumar

मन्ने-परमन्ने दे फिल्म अभिनेता मनोज कुमार हुंदा अज्ज बड्डुलै मुम्बई च काल होई गेआ। ओहू 87एं बरें दे हे। देशभक्ति आहली फिल्मां बनाने करी ओहू “भारत कुमार“ दे नां कन्नै बी मशहूर हे। कई दाहकें तगर भारती सिनेमा च उन्दे बेजोड़ जोगदान लेई उनेंगी बड़े मते प्रतिष्ठित आहले सम्मान पदमश्री ते दादा साहेब फाल्के पुरस्कार कन्नै बी सममानित कीता गेआ हा। उपराज्यपाल मनोज सिन्हा होरें मनोज कुमार हुंदा काल होई जाने पर बसोस प्रगट कीता। सोशल मीडिया पर अपने इक स्नेह च उपराज्यपाल होरें आखेआ जे मनोज कुमार होरें अपने अभिनय कन्नै लोकें दे मनै च अपनी खास थाहर बनाई दी ऐ। उंदी अदाकारी नै सिनेमा च अनमुल्ला योगदान दितता ऐ जिसी म्हेशां चेत्ता कीता जाग।

<><><><><><>

JK-LED

31 मार्च 2025 तगर जम्मू-कश्मीर च गलिएं च लाइटां लाने सरबंधी राश्ट्रीय प्रोग्राम तैहत इक लक्ख 88 ज्हार एल.ई.डी स्ट्रीट लाइट्स लाइयां गेइयां न। एह जानकारी सरकारै लोकसभा च दित्ती। बिजली मंत्री मनोहर लाल होरें आखेआ जे 31 मार्च 2025 तगर 1 लक्ख 88 ज्हार 860 एल.ई.डी स्ट्रीटलाइट्स लाए गेन। एहदा मकसद जम्मू-कश्मीर दी उर्जा सरबंधी कारकरदगी गी बदाना ते शैहरी ते ग्रामीण इलाके च एल.ई.डी लाइटां लाइयै लोके गी सुविधा उपलब्ध करोआना ऐ।

<><><><><><>

Kishtwar Ram Navmi

किश्तवाड़ दे डिप्टी कमिशनर राजेश कुमार शवन होरें औंदी रामनौमी दे ध्यार दी तैयारियें दी समीक्षा करने लेई ते उनेंगी मुकदा रूप देने लेई बक्ख-बक्ख मुतलका मैहकमें दे अधिकारियें कन्नै बैठक लाई। बैठक दौरान सनातन धर्म सभा दे नुमाइंदे ध्यार दियें तैयारियें बारै व्यापक सुझा दित्ते जिंदे च साफ-सफाई, विजन कुसै रूकावट दे पानी ते बिजली दी सप्लाई, ट्रैफिक प्रबंधन ते होरनी चीजां शामिल हियां। डी.सी होरें इस दौरान स्वच्छता यकीनी बनाने ते खास करियै मंदरें दे आले-दोआले साफ-सफाई बनाई रखवने पर जोर दिंदे होई मुतलका मैहकमें गी निर्देश जारी कीते।

<><><><><><>

Kishtwar-Samadhan

किश्तवाड़ दे ए.डी.सी. पवन कोतवाल होरें पाडर नागसेनी हल्के च जे.के समाधान पोर्टल 2.0 तैहत लोके आसेआ पंजीकरण च हासल प्रगति बारै व्यापक जायजा लैने लेई बैठक दी अध्यक्षता कीती। इस बैठक दा मकसद हालिया पंजीकरण स्थिति दी जानकारी हासल करने दे कन्नोकन्नी एहदे च पेश आवारदी चुनौतियें थमां निब्वड़ने लेई रणनीतियां लागू करना हा। इस मौके पर एडीसी होरें जे.के समाधान पोर्टल दा शकैतें दा नबेड़ा करने च योगदान गी उजागर कीता ते लोके आसेआ दिक्कतें-शकैतें दे नबेड़े च पारदर्शिता यकीनी बनाने पर बल दित्ता।

<><><><><><>

Vollyball-Udh.

जम्मू-कश्मीर पुलसा दे शहीद सब-इंस्पेक्टर दीपक शर्मा होरें'गी इक श्रद्धांजलि दे तौर उप्पर सिविक एक्शन कार्यक्रम दे तैहत उधमपुर पुलस आसेआ कल जिला पुलस लाईन्स च वॉलीबॉल टूर्नामेंट दा आयोजन कीता गेआ। खरी मती गिनतरी च लोकें इस कार्यक्रम हिस्सा लैता। उधमपुर जिले दे बक्ख-बक्ख हिस्सें थमां कुल 8 टीमां हिस्सा लै'रदिआं न। डीएसपी हैडक्वार्टर्स प्रहलाद शर्मा होर कार्यक्रम दे मुख परौहने हे ते अपने भाषणै च उ'नें युवाएं दे विकास लेई खेड्डें दे महत्व पर लोऽ पाई। उ'नें नौजवानें गी अपील कीती जे ओहू खेड्डें च मती कोला मती शमूलियत जकीनी बनान।

<><><><><><>

IPL

आईपीएल क्रिकेट च अज्ज संजा साढ़े 7 बजे लखनऊ च लखनऊ सुपर जायंट्स ते मुंबई इंडियन्स बश्कार मकाबला होग। कल रातीं कोलकाता नाईट राईडर्स नै सनराइजर्स हैदराबाद गी 80 रंजें कन्नै हराई दित्ता। 201 रंजे दे लक्ष्य दा पिच्छा करदे होई हैदराबाद दी टीम 16.4 ओवरें च 120 रंज गै बनाई सकी।

<><><><><><>

Weather

मौसम विभाग नै केन्द्र शासित प्रदेश जम्मू-कश्मीर च अगले हफ्ते बरखा बरने दी पेशगोई कीती ऐ। अज्जै थमां 8 अप्रैल तोहड़ी मौसम खुशक रौहग पर विभाग दा आखना ऐ जे 8 अप्रैल गी दपैहरी मगरा गासै पर बढ़ल घनोने ते उत्तरी कश्मीर ते सोनामर्ग दिएं उच्चिणं धारें पर हल्की बर्फबारी दी मेद ऐ। एहदे परैन्त औंदी 9 ते 10 अप्रैल गी कश्मीर संभाग दिएं मती सारी थाहें सने जम्मू खित्ते दिएं टामीं-टामीं थाहें पर हौली बरखा ते उच्चिणं धारें पर बर्फबारी होई सकदी ऐ। एहदे मगरा 11 अप्रैल गी बी मौसम बदलोखड़ा रौहग ते मैदानी इलाकें च हौली बरखा बरने ते उच्चे प्हाड़ी इलाकें च हल्की बर्फबारी दा इमकान ऐ।

<><><><><><>